

Si Venus in quarta in aspectu infortunæ fuerit, uxor patris morietur prius quàm pater ipse. Et si signum fuerit mobile, pater habebit alias uxores, & sepeliet eas.

Signum coniunctionis præcedentis natale, patris etiam esse ostendit. Signum uero præuentionis, ostendit matris accidentia.

Domini domorum, scilicet Solis in die, & Saturni in nocte, significant futura patris accidentia. Vide etiam conuenientiam quam habent in hora genethliaca, planetæ diurni cum Sole, & in natali nocturno planetæ nocturni cum Saturno.

Vitæ parentum significatores sunt tres, primus est locus dispositoris, secundus dominus eius loci, tertius locus ipsius domini, quorum potentior est locus dispositoris, & consequenter locus ipsius domini. Verbi gratia, pro patris uita. Si natiuitas diurna fuerit, primò considerandus est Sol. Sed si nocturna, Saturnus in quo loco sit. Vt in diurna, si Sol fuerit in Aquario. Deinde considerandus dominus loci Solis, qui est Saturnus. Tertio locus Saturni, id est, signum in quo est. Vnde si fortuna habuerit participationem cum loco significatoris fœlici aspectu, uel si Saturnus & Sol fuerint in sextili uel trino, nam ambo sunt significatores patris, prolongabitur uita patris post natiuitatem filij. Et si Sol fuerit in angulo, & fuerit participatio fortunarum, prorogabitur per multa tempora uita patris post natiuitatem filij. Si uero significatores patris non essent potentes, aut forte essent in casu, aut detrimento & debiles, & infortuna, ut puta Mars eos aspexerit, aut forte Mars Solem quadrato, uel opposito, incurret pater magnam debilitatem post natiuitatem filij, & erit uita damnosa, & timeat de morte subitanea, uel accidet ei damnum in oculis. Et si Saturnus aspexerit Solem quadrato uel opposito, uel eleuabitur super eum, accident patri febres cum tremore, uel apostemata in gutture, & plures infirmitates uix aut nunquam curabiles, & debilitatem corporis eius denotabunt.

In longitudine autem & breuitate uitæ matris, aspici debent Venus & Luna. Venus si natiuitas fuerit diurna, Luna si nocturna. Vnde si Luna fuerit fortunata, puta in suo domicilio, exaltatione, uel triplicitate, & locis fortibus, & si Venus aspexerit eam sextili uel trino, uel ei coniungitur, prolongabitur uita matris. Si uero Luna non fuerit fortunata, nec in dignitatibus suis, & Mars ipsam quadrato uel opposito aspexerit, timendum est de morte matris subitanea post partum. Et si Mars aspiceret Venerem, accideret matri mors ex febribus, & obscuritas oculorum. Si Saturnus aspexerit Lunam quadrato uel opposito, accident matri infirmitates longæ, & consumptio corporis ex pthisi. Quòd si Saturnus aspiciet Lunam, & inueniet eam orientalem, mors matri ueniet per febrem & tremorem. Si Luna fuerit occidentalis habebit apostema in matrice, uel Cancrum in pudore. Si Mars aspexerit Lunam, & Luna fuerit occidentalis, accidet mors matri, uel amissio filiorum.

Si Sol in diurna uel Saturnus in nocturna, & pars patris aspexerint ascendēs, uel dominum eius quadrato uel opposito, pater filium auersabitur, & odio habebit, & curabit ut interficiatur. Et si ☽ in nocturna, uel ☿ in diurna, & pars matris ascendētē de quadrato uel opposito &c. ut supra aspexerit, erit hoc idē significatū de matre.

Si pars fortunæ infortunata in signo masculino astiterit, pater prius morietur. Si in fœminino, mater.

Tempus mortis parentum scies per directiones significatorum ad malos & ipsorum radios.

Cuiuscumq; parentis pars in figura nati infortunata fuerit, is prior morietur. Si patris, pater; Si matris, mater.

Si natalitia hora, dominus primæ in octaua fuerit, periculum erit ne mater nati ex partu moriatur, idēq; maxime continget, si fuerit impeditus.

Si quartæ dominus fuerit à domino primæ corruptus, timebitur idem de patre, & nota quòd in hoc primogenitus est magna significatio in re patris.

Dominus duodecimæ male locatus, si infortunatus fuerit, matrem nati constituit in mortis periculo, quod forte erit lætale.

M iij Si